

# Канон святым мученицам Минодоре, Митродоре и Нимфодоре

Канон святых жен, егоже краегранесие: Трех сестрениц  
искренних страдания чту. Иосиф. Глас 4.

## Песнь 1

*Ирмос: Отверзу уста моя,/ и наполнятся духа,/ и слово отрыгну Царице Матери,/ и явлюся светло торжествуя, // и воспою, радуясь, Тоя чудеса.*

Троицу несозданную, Юже благочестно проповедаете,/ милостиву нам сотворите, мученицы славнии,/ ныне чтущим ваша божественныя страсти и исправления, богоблаженныя.

О глаголах небрегоша мучителя отроковицы,/ божественным ограждаемы оружием веры,/ и подъяша мук треволнение/ и смерть неправедну за всяческих Жизнь.

Силою укрепляемы всемошною Зиждителя,/ мужеский приаща нрав всечестныя/ и змия строптиваго и величаваго ногами попраша/ и на землю низложиша.

*Богородичен: Яко одушевлен храм, яко нетленну скинию,/ яко дверь Небесную, яко Божественную трапезу,/ яко палату и престол Владычень,/ Марию Чистую песньми почтим.*

## Песнь 3

*Ирмос: Не мудростию и силою, и богатством хвалимся,/ но Тобою, Отчею ипостасною мудростию, Христе:// несть бо свят, паче Тебе, Человеколюбче.*

Умерщвленный умом пребеззаконный мучитель/ Жизни нашея, Христа, люте отрещися понуждаше тя,/ мученице Минодоре, ураняя.

Взирающая к Богу мучитель не пощаде,/ но жезлием немилостивно сокруши уды твоя,/ венец тебе плетый вечный, мученице, неувядающий.

Муками, требогатыя святыя мученицы,/ сокровище на Небесех и вечнующую славу обретоша,/ ясно Богу приближишася.

*Богородичен: Явльшися, души моя тьму отжени/ и греховныя пленицы расторгни, Чистая Дево,/ и спаси мя, рождающая Всещедрого.*

## Седален, глас 4.

Подобен: Удивися:

Удивишася вашему терпению многому Небеснии лица безплотных Сил:/ якоже бо иному страждущу пребываєте,/ голени и составы сокрушаемы,/ смерть горькую терпяще/ и женским телом змия отступника сокрушающе,/ девы, невесты Жизнодавца, веры поборницы.

*Слава, и ныне, праздника, глас тойже:*

От корене Иессеева и от чресл Давидовых/ Богоотроковица Мариам раждается днесь нам;/ радостию бо радуются всяческая и обновляются./ Срадуйтеся купно, Небо и земля./ Восхвалите Ю, отечествия язык,/ Иоаким веселится, и Анна торжествует, зовущи:/ неплоды раждает Богородицу и Питательницу Жизни нашея.

## Песнь 4

*Ирмос: Седяй в славе/ на Престоле Божества,/ во облаце легце/ прииде Иисус Пребожественный,/ нетленную дланию,/ и спасе зовущия:// слава, Христе, силе Твоей.*

Сияючи лучами Креста,/ присноблаженная Митродора, к древу привязана,/ терпяше огненную муку,/ прелести углие росой любви Христовы погашаючи.

Явленным видением помысл простираючи,/ зрящи Жениха доброты недомысленныя,/ биема жезлием, присноблаженная Митродора/ терпяше доблественне болезни.

Украститесь, девы, и светло прославистесь,/ препрославленное Слово всячески возлюбивше,/ Егоже уязвлены любовью,/ претерпесте страстей нашествия крепче.

*Богородичен:* Умерщвлена мя злобою лъстиваго, Всенепорочная,/ Жизнь рождающая, оживи, к Тебе бо прибегах;/ и впадшая во глубину греховную/ возведи, яко милостива, Всенепорочная.

### **Песнь 5**

*Ирмос: Ты, Господи мой, Свет/ в мир пришел еси,/ Свет Святый, обращающий из мрачна неведения// верою воспевающий Тя.*

Нрав терпелив и непобедим смысл/ мученицы пред судищем показавше,/ победы венец себе исплетоша.

Ныне терпит железных ногтей терзания крепко/ повешена Нимфодора,/ Жениха возлюбивши Безсмертного.

Трисветлая свещи,/ трикровая храмина, селение Троицы,/ да похвалятся песнями девы богомудрыя.

*Богородичен:* Тя едину избранну и добру и непорочну обрет,/ воплощается Пребожественное Слово из Тебе, Богорадованная.

### **Песнь 6**

*Ирмос: Пожру Ти со гласом хваления, Господи,/ Церковь вопиет Ти,/ от бесовския крове очищися,/ ради милости от ребр Твоих// истекшею Кровию.*

Видети желающе Твою доброту недомысленную,/ уязвляемы любовью Твоею сладчайшею, Безначальне Слове,/ мук лютость доблественне претерпеша.

Яко крини в верте страдальцев,/ процветоша преславныя отроковицы/ и Церковь вонями различных мук облаговониша/ Духа благодатию.

Жениха Безсмертного Единого желающе,/ невидимую силою укрепляемы,/ видимую смерть явленно преобидеша девы отроковицы.

*Богородичен:* Свят вселившийся в ложесна Твоя Господь,/ Святейшу обрет Тя и Чистейшу твари всяя,/ Богомати Господоименитая, Пречистая Владычице.

### **Кондак, глас 4.**

Подобен: Вознесыйся:

За Троицу терпеливно страдальчествовавший,/ многокозненного врага победисте,/ братски облекшесь Духом;/ темже водвористесь с пятью девами/ в Небесном, страстотерпицы, чертозе,/ и со Ангелы Всецарю// в веселии непрестанно предстоите.

### **Песнь 7**

*Ирмос: Авраамстии иногда в Вавилоне отроцы/ пещный пламень попраша,/ песнями зывающе:// отец наших Боже, благословен еси.*

Жрети идолом глухим злочестиваго мучителя повелевающа/ оплевасте, вопиюще, отроковицы:/ отцев наших Боже, благословен еси.

Просвещенныя умом богоначальными зарями,/ мглу идольскую очерните, всехвальныя, поюще:/ отцев наших Боже, благословен еси.

Ни отсечения удес, ни гонение, ни скорбь/ Христа отлучити отнюд возмогоша, вопиющим мученицам:/ отцев наших Боже, благословен еси.

*Богородичен:* Преестественно Зиждителя от утробы Твоея, Дево, родити сподобилася еси,/ земныя назидаяща, поющия верою:/ Боже, благословен еси.

### **Песнь 8**

*Ирмос:* Избавителю всех Всесильне,/ посреде пламене благочествовавшия,/ снизшед, оросил еси/ и научил еси пети:// вся дела, благословите, пойте Господа.

Изострившеся любовию Творца,/ притуписте жала змииная,/ в женстем телеси мужеския восприемше подвиги,/ и венцы Небесными венчаетеся.

Сплетшеся посреде подвига,/ невидимыя враги с плотию безплотныя победиша/ богомудрыя отроковицы, вопиюще:/ благословите, вся дела Господня, Господа.

О Бозе Спасе вжиляемы,/ о Христе Иисусе возмогающе,/ вражию некрепкую погубисте державу, воспевающе:/ всякая дела, благословите, Господня, Господа.

Царство вышнее получите,/ со Христом Иисусом царствующе,/ испещрены ранами мук, добротою украшены,/ досточудныя отроковицы.

*Богородичен:* Яко Божие нескверное жилище,/ Егоже прияла еси воплощаема/ и во дву естеству знаема, Отроковице,/ Емуже поем: благословите, вся дела Господня, Господа.

### **Песнь 9**

*Ирмос:* Камень нерукосечный,/ от несекомыя горы, Тебе, Дево,/ краеугольный отсечеся,/ Христос, совокупивый разстоящаяся естества:// Тем, веселящеся, Тя, Богородице, величаем.

Видети желающе доброту Жениха,/ всеобразным манием к Нему, богоносицы,/ безсмертию поучистеся в мертвеннем телеси./ Тем достойно ублажаетеся.

Явистеся мучителей посреде,/ аки в волцех суровых, агницы нескверныя,/ сих зверовидное преборающия,/ и Христу, благоприятна яко жертва, принесостеся.

Венец исплетосте купно неветшающ, девы,/ божественныя улучивше славы,/ и Царствия истинно непоколебимаго прияти,/ яко мученицы, с мученики сподобистеся.

Еяже сподобистеся славы,/ еже получите ликование,/ совершающим любовию вашу память улучшить молитесь,/ яко дерзновение имуще ко Владыце, честныя девы.

*Богородичен:* Пощади мя, Христе,/ егда хочещи судити мир со славою,/ разори мглу страстей моих/ молитвами Рождшия Тя и честных мучениц Твоих,/ яко Благ и Многомилостив.